

**Ն. Ս. Օ. Տ. Տ. ՓԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ
ՈՒՂԵՐՁԸ ՀԱՅՈՑ ՑԵՂԱՍՊԱՆՈՒԹՅԱՆ ՍՈՒՐԲ ՆԱԿԱՏԱԿՆԵՐԻ
ՀԻՇՆԱՏԱԿԻ ՕՐՎԱ ԱՌԻԹՈՎ**

(24 ապրիլի, 2022 թ.)

Սիրելի՛ ժողովուրդ հայոց ի հայրենիս եւ ի սփյուռս,

Այսօր համախմբվելով մեր սրբազան տաճարներում, մեր քայլերն ուղղելով դեպի Ծիծեռնակաբերդի բարձունք, աշխարհասփյուռ համայնքներում կանգնեցված խաչքարեր ու հուշակոթողներ՝ մեր խոնարհումն ենք բերում Հայոց ցեղասպանության սուրբ նահատակներին: Նրանք զոհ գնացին օսմանյան իշխանությունների ցեղասպան ծրագրին իրենց հայրենի բնակավայրերում եւ գաղթի ճանապարհներին՝ մարտիրոսություն մկայելով հավատարմությունը նախնյաց հավատին, դավանած արժեքներին եւ ազատ ու անկախ կյանքի տեսլիքին:

Եղեռնահար ու հայրենագրկված մեր ժողովուրդը, առ Աստված ապավինություն մը, կամք եւ ուժ գտավ՝ վերընձուղելու իր անկախ պետականությունը պատմական հայրենիքի արեւելյան փոքր հատվածում եւ շէն ու բարօր կյանք կերտելու իր զավակներին ապաստան տված աշխարհի տարբեր երկրներում:

Ցեղասպանությունից մեկ դար անց՝ արցախյան 44-օրյա պատերազմից հետո, մեր երկրի առջեւ ծառացած մարտահրավերները, հայրենիքի շուրջ ծավալվող աշխարհաքաղաքական գործընթացները, Ադրբեջանի ագրեսիվ ու հայատյաց քաղաքականությունը փաստում են, որ վերացված չեն հայրենաբնակ մեր ժողովրդի, ի մասնավորի Արցախի հայորդիների ապահով ու անվտանգ կյանքի սպառնալիքները: Մեր սուրբ նահատակների հիշատակի առջեւ նվիրական մեր պարտքն է համախմբվել եւ պաշտպանել արցախահայ մեր ժողովրդի ազատ ու անկախ ապրելու իրավունքը, Հայաստան ու Արցախ մեր աշխարհի անվտանգությունը, կանխել Ադրբեջանի վերահսկողության տակ անցած տարածքներում հայկական հոգեւոր-մշակութային ժառանգության բարբարոսաբար ոչնչացումը, որ չկրկնվի Նախիջեւանում իրագործված մշակութային

եղեռներ: Այլեւ նվիրական մեր պարտքն է հետամուտ լինել Հայոց ցեղասպանության համընդհանուր ճանաչմանն ու դատապարտմանը, որ երբեք նման ոճրագործություն տեղ չգտնի մարդկության կյանքում, եւ արդարություն իրականացվի ցեղասպանության զոհերի եւ ցեղասպանություն վերապրած բոլոր ժողովուրդների նկատմամբ: Պետական եւ ազգային-եկեղեցական կառույցների, ամենքիս հանձնառությունը պիտի շարունակի մնալ միջազգային հարթակներում բարձրաձայնումն Արցախի մեր ժողովրդի ոտնահարվող իրավունքների եւ հայոց արդար դատի՝ ի խնդիր ազգիս արժանապատիվ եւ լուսավոր կյանքի ու գալիքի:

Մեր աղոթքն է, որ հարուցյալ Տերը մեր, սուրբ նահատակների բարեխոսությամբ, խաղաղություն պարգեւի ողջ աշխարհին, ապահովություն ու բարօրություն՝ Հայաստան եւ Արցախ մեր երկրին եւ աշխարհասփյուռ մեր ժողովրդին: Թող Բարձրյալի ողորմությունը, օրհնությունն ու խնամքը հովանի լինեն ամենքիս, այսօր եւ միշտ, ամեն:

